



Endrizzar danovamein nies cumpass intern

Brev pastoral
per la Cureisma 2023

Joseph Maria Bonnemain,
Uestg da Cuera

Indicaziun per ils texts liturgics

Lecziuns dalla 1. dumengia da Cureisma A

1. Lecziun: Gen 2,7-9; 3,1-7

2. Lecziun: Rom 5,12-19 (ni 5,12.17-19)

Evangelii: Mt 4,1-11

*La brev pastorala ei da preleger en tuts survetschs divins
l'emprema dumengia da Cureisma, ils 26 da fevrer 2023.*

*Ella sa vegnir publicada ellas medias
naven dils 27 da fevrer 2023.*

*Bezugsquelle:
Bischöfliche Kanzlei, Hof 19, 7000 Chur
kanzlei@bistum-chur.ch*

Caras soras, cars frars

«*Miu reginavel ei buca da quest mund*» (Gn 18,36).
Aschia rispunda Jesus sco accusau a Pilatus. Quella constataziun da Jesus semuossa era ellas tentaziuns, allas qualas el ei livraus ora el desiart nua ch'el ei vegnius me-
naus suenter siu batten el Jordan. Tenor las insinuaziuns dil tentader e las rispostas da Jesus che nus vein astgau udir egl evangeli, vegn il suandont clar a nus:

Buc il cuntentar ils basegns corporals e materias san saziar il carstgaun cumpleinamein. Buca rihezia, beinstonza e luxus fan nus diltuttafatg ventireivels, era buca success, prestisch e honor. Quei che fa nus carstgauns per propri rehs e sin la liunga ventireivels, anflein nus buca sin quest mund. Da quei stuein nus adina danovamein vegnir cunscients. La fom suenter enguordetgna e pussonza satiua incuntin ils carstgauns e muossa che nies pli profund desideri sa duront l'entira veta buca vegnir cuntentaus cumpleinamein. Il reginavel pil qual nus essan scaffa, ei,

sco Jesus Cristus attesta, buca da quest mund. Nus tuts essan sco pelegrins sin via tiel Bab celestial. Nus encurin la carezia ch'enconuscha negina fin.

Momentanmein sentan bia carstgauns ina certa tema e resignaziun. Arisguard nies futur e quel dil mund essan nus irritai. Tochen avon cuort er'ins dil meini che la carschientscha economica ed il progress s'augmentien incuntin. Uiaras, la midada dil clima, l'inflaziun, la scarsesia d'energia ni era las consequenzas dalla pandemia perregian nus ed han tschentau en damonda quella fidonza. Savess quei forsa esser in'enzenna che quella fidonza ei focusada memia zun sin nossa veta terrestre? Sche nus sesentin accumpignai e purtai d'in Diu, savein ed astgein nus buca resignar, malgrad che nus vesein strusch ina sligiazion. Il cuntrari: Nus astgein esser plein speronza, pertgei nies Diu regala a nus patria eterna en el. Jesus Cristus di: «*En casa da miu Bab ein bia avdonzas. Ch'ei fuss buc aschia, vess jeu lu detg a vus: Jeu mon a preparar in plaz per vus?*» (Gn 14,2).

Nossa finamira en Diu duei denton buca far nus indifferents enviars quei da quest mund, pia il terrester. Il cuntrari. Da saver ch'il Diu trinitar ei nies origin e nossa

finamira, duei adina intimar nus da formar nossa veta aschia che la visiun divina per nies mund sa vegnir realisada. Tgi che crei enten in parvis, sestenta detschartamein per pasch, giustia, protecziun dalla scaffiziun e per fraternitad. Nus savein numnadamain che Dieus ha confidau a nus la responsablidad correspondentia e che nus vein alla fin da dar plaid e fatg. Buca dubitar nus lai quei che Jesus ha detg «*En verdad jeu ditgel a vus: Quei che vus veis fatg ad in dils pli pigns da mes frars, veis vus fatg a mi.*» (Mt 25,40).

La Baselgia ei buc in'organisaziun, mobein ina cuminonza da carstgauns ch'ei cun desideri sin la tscherca – ella ei il tgierp da Cristus ed il pievel pelegrin da Diu. Cheutras savein nus capir meglier ch'ella ei indispensabla. Ei drova la Baselgia oravontut en in mund che snega la veta suenter la mort e che sustegn in consum stravagau ed il materialissem. Nus cristians essan clamai da regurdar in l'auter vid la verdad che mo Dieus sa veramein saziar nus. Senza transcendenza savein nus buca daventar veramein ventireivels. Aschia ei nies cumpass intern adina drizzaus viers Diu ch'ei en perpeten la finamira da nies pelegrinadi ter-rester.

Da Buania ha Papa Francestg detg en sia homilia: «*La via dalla cardientscha entscheiva sche nus dein cun la grazia divina spazi al malruaus che mantegn nus allerta; sche nus seschein tschentar en damonda, sche nus secuntentein buca en ruaus cun nossas disas, mobein sedein giu cun las provocaziuns dil mintgadi; sche nus calein da vuler ruassar en in spazi neutral, mobein sedecidin da serender els spazis dalla veta meins emperneivels che consistan ord las relaziuns cun nos concarstgauns, ord surpresas, ord causas incalculablas, ord plans e siemis che ston vegnir realisai, ord anguoschas cun las qualas ins sto viver ed ord suffrientschas che astgan buc schar nus freids. En quels muments sereghegian en nos cors quellas damondas inevitablas che arvan nus per la tscherca suenter Diu: Nua ei la ventira per mei? Nua sesanfla la veta emplenida per la quala jeu bramel? Nua ei la carezia che svanescha buc, che va buc empaglia pervia da fleivlezia, da disdir e tradiment? Tgei schanzas ein zuppadas en mias crisas e miu pitir?» (Papa Francestg, 6-1-2023).*

Sco Baselgia essan nus frars e soras che astgan adina danovamain mussar in l'auter la clamada celestiala e perpetna. Sco battegiai s'udin nus tier la cuminonza dils sogns. Quei vul dir: Nus essan membra dalla Baselgia e

part dil tgierp da Cristus. Quella appartenenza entras Batten e Creisma sa buca vegnir sliada. Ual aschi insaziabels ei nies desideri per ventira infinita, per cumplida e plenezia ella carezia tier Diu.

Unius ell'oraziun culs meglers auguris salidel jeu Vus cordialmein

+ Joseph Maria

+ Joseph Maria

Uestg da Cuera

